

faut, dit-il à sa femme? que ie sçache qu'elle prise ont faict ces gens-là; car ie vois bien à leur mine qu'ils voguent en gens victorieux; affeurément ils ont pris de nos compatriottes; il [47] met sa femme à terre, puis s'en allant de l'autre costé de la riuere, comme s'il fut venu du païs des Hiroquois; il tire vn coup d'arquebuse. Les Hiroquois ne le voyans pas bien, & croyans peut-estre que c'estoit quelque troupe de leurs foldats qui arriuoit de nouveau en ce quartier-là, firent quarante cris, tirans quarâte fois ces voyeles du fond de leur estomach *hee*; c'est affez, dit cét Algonquin, ie n'en voulois pas dauantage, ie sçay ce que ie desirois, affeurément ils tiennent quarante de nos gens prisõniers. Il r'embarque sa femme, & s'en court à force de rames vers quelques hommes qu'il auoit quittez, il leur raconte ce qu'il a veu & entendu, les exhortant à fuiure l'ennemy; sept ieunes hommes se presentent à luy, ils mōtent dans deux canots & s'en vont lestement au lieu où l'ennemy estoit. Il n'y à point de chasseurs si aspres au gibier, que les Sauuages le sõt à la chaffe des hommes; il n'y à point de chat si adroit pour se tapir, & pour se cacher, & pour fauter sur vne fouris, qu'vn Sauuage est habile pour surprendre & pour se lancer sur sa proye; ils se glissent doucement, ils remarquent les pistes de leurs ennemis, les vont reconnoistre à pas de loup; ils auiferent dans l'obscurité cinq cabanes ensemble, [48] allons, dirent-ils, tiõns & mourons, vendons nostre mort. Vne seule cabane contenoit plus de combattans qu'ils n'estoient d'affaillans; l'ordre fut que six entreroient dans les trois plus grandes cabanes, deux en chacune, & les deux autres dans les deux plus petites. Il y auoit deux